

## DESVELHA'T BÈRA DROMILHOSA

Desvelha't bèra dromilhosa  
Enten la votz de ton Janet,  
Qui dessus la brana sabrosa,  
Canta los èrs deu Diu Janet.

A sons accents, las irongetas  
Juenhen lurs gasolhís charmants  
E de cap au cèu las laudetas  
Pujan dab bèths hardits eslanç.

Dejà l'aubeta ensafranada  
Peu som deus costalats luseish,  
E Flòra per demei la Prada,  
Dens bèth arrós se rafresqueish.

Zefir, deu cap de son aleta,  
Careça las charmantas flors,  
E de las honts l'aiga clareta  
Qu'espaneish las doças sentors.

Ça-vi donc lèu, dromilhosa,  
Joír d'aqueth tableau tan doç;  
Si non t'i cédés, pastoreta,  
Jo que't fretarès los uelhons.